



স্বপ্নের - স্বপ্নের

লেখাচিত্র
বিশ্ব জৈবিক

প্রথম প্রকাশ •

২৫শে বৈশাখ ১৩৫৮

প্রকাশক

বিকাশন-এর পক্ষে

নীলাঞ্জনা হালদার

১৮১।১ আচার্য জগদীশচন্দ্র বসু রোড

কলিকাতা-৭০০০১৪

মুদ্রক

স্বর্ধনারায়ণ ভট্টাচার্য

তাপসী প্রেস

৩০ বিধান সরণী

কলিকাতা-৭০০০০৬

উৎসর্গ
যাকে করছি
সে জানে

লেখাগুলো হয়ত 'আধুনিক বাংলা কবিতা' নয়— এদের বোঝা যায়

অ. চ.

নীল তীর- রক্তাক্ত আকাশ

কৈফিয়ৎ	১১
রক্তাক্ত আকাশ	১৩
রাত এগারোটা	১৫
মানুষ	১৭
উদ্ভঙ্কন ?	১৯
শিকারী°	২০
অহংহনি—	২৩
শেলী (অনুবাদ)	২৫
জ্ঞানপাপী	২৭
মরীচিকা	২৯

ঘুঘু	৩১	
স্বপ্নসম্ভবা	৩৩	
যেনাহ্ম—	৩৫	
তবু	৩৭	
দ্বন্দ্ব	৩৯	
শেষ নেই	৪১	
কতোবার	৪৩	
পৃথিবী — ? আমার পৃথিবী		৪৫
কংকাল	৪৭	
ফুলদানিটা	৪৯	
প্রাণ চায়—	৫০	
পুতুল	৫৩	
সাস্তনা [১] [২]		৫৫
মানুষ-আয়না-কবিতা		৫৭
শেষ প্রেম	৫৮	
উপলক্ষ্য	৬১	
দণ্ডকারণ্যে	৬৩	
সংখ্যার সাংখ্য	৬৫	
কলহ	৬৭	
মিটমাট	৬৯	
ছোট ছোট	৭১	
চিঠির কুচি	৭৩	
পক্ষপাত	৭৫	
জীবন- জীবন	৭৭	
জানোয়ার	৭৯	
ধুবতারার ছাই	৮১	
অন্ধকারের সুর	৮৩	
কবির প্রেম	৮৪	
জলের ফোঁটা	৮৭	
নীল তীর	৮৯	





কৈফিয়ৎ

কোনো কাজ নেই হাতে । বিশ্ববিদ্যালয়
তালাবন্ধ । কর্তৃপক্ষ খাসা বসে আছে ।
তারাবাগ থমথমে । এর ধারে কাছে
মানুষ আসে না আর । চারিদিকে ভয় ।
উৎকণ্ঠিত অনিশ্চিতি—কখন কি হয় !
চুপিচুপি কথাবার্তা—শোনে কেউ পাছে ।
গুণ্ডারা লুকিয়ে আছে আনাচে কানাচে
এ খবর রটে গেছে বর্ধমানময় ।

একই কথা বার বার আলোচনা করে
প্রাণ হয় ওষ্ঠাগত । দোরে খিল দিয়ে
চুপচাপ একা একা শুয়ে থাকি ঘরে,
মাঝে মাঝে পদ্য লিখি ইনিয়ে বিনিয়ে ।
রিসার্চের ছাত্রীটিও হয় না এমুখী ;
কি করে বা আসে বলা ? বিপদের ঝুঁকি ।

এগারো



রক্তাক্ত আকাশ

আমি কি এখনও কিছু চাই ?

কি করে নেব ?

হাতে রক্তের দাগ ।

উন্মুখ শকুনেরা মিনিট গুণছে

জনতার কলরোল শুরু করে দিচ্ছে হৃদয়কে । শুরু ।

শুরু ।

অতএব

সবাই মিলে স্লোগান দাও

জোরে

আরও জোরে

আরও আরও জোরে

—আমি যে আর সহিতে পারি না ।

লাল লাভা ঢেকে দেয় দিগন্তজোড়া সবুজ ধান

মেঠো পথ

কুড়েঘরের চাল

মন্দিরের মাথার ত্রিশূল ।

রক্তের স্রোত ফুটছে ফুলছে ফুঁসছে—

হিস হিস করে নাগনাগিনীর দল ।

কি নেব ?

কেমন করে চাইব ?

সমস্ত আকাশে রক্তের দাগ ।



রাত এগারটা

আকাশে একটিও তারা নেই
রূপরূপ করে জল পড়ছে
দমকা হাওয়ায় জানলাটা খুলে গেল ।
ভাঙা বেড়ায় ঝাঁঝিঁর ডাক
আর জল থৈ থৈ পুকুরে ব্যাঙের ঘ্যাঙর ঘ্যাঙ ।
...তুমি কি এখন জেগে আছ ?

পনেরো



মানুষ

মনটা বিগড়েছে ।

ভাবতে চায় না তোমাকে ।

আশ্চর্য !

স্মৃতি এসেছিল ।

ছিল অনেকক্ষণ ।


একদিন ও আমাকে ভালবাসত ।

আজ হয়ত ওকে আমি ।

কিছুতেই ভাবতে পারছি না তোমাকে ।

ক্ষমা কোরো ।

আমি মানুষ ।



উদ্বন্ধন ?

ইস্পাতের ফ্রেমে বাঁধা

উড়ন্ত চাকির ফসিল

উইধরা কাঠের গম্বুজে

শাকখাওয়া ধোয়ার কুণ্ডলী

খড়কুটো জড়োকরা

আগুনের ক্ষণিক বিলাস

নীলমেঘে টলটলে

ফটিকের নিরাসক্ত ডল...

চাঁদের স্তোত্র গাথা প্রেমের কবিতা

পাঁঠারা গলায় দিয়ে

সারি সারি হাঁড়িকাঠে যায়

মা কালীর উলঙ্গ আহ্বান



শিকারী

ছাঁটা ঝাড় তলায় বেড়াল
ছবির বেড়ালের মত নিশ্চল, নিঃসাড়, নিঃস্পন্দ
চোখে লালসার আগুন।
শালিখ ঘাসবীজ ঠোকরাচ্ছে।...

গোলাপের ডাল ছাঁটে তিনটে মালী
সামনের বাড়ীর মেয়ে ডালিয়ায় জল দেয়
রং বেরং-এর প্রজাপতি লুকোচুরি খেলে ফুলে ফুলে
সৌন্দর্যচঞ্চল পৃথিবী

বেড়াল এগিয়ে এসেছে
আসন্ন চরিতার্থতার আশা ধকধক করে সর্বাঙ্গে
শালিখ একদৃষ্টে চেয়ে ।

সম্মোহন ?...

মালীরা ডাল জড়ো করছে
মেয়েটা অণু একটা টব ধরেছে
প্রজাপতিরা এখনও উড়ছে ফুলবনে ।
পৃথিবী জীবনচঞ্চল ।


শালিখ বেড়ালের খাবায়
বিগ্ধত বিধ্বস্ত নিঃস্পন্দ ।
অলস বেড়াল তাকায় এদিক ওদিক—সরে বসে
থাবা চাটে একবার ।...

মালীরা বিড়ি ধরায় .
মেয়েটা কলে যায় ঝারি ভরতে
প্রজাপতির ঝাঁক উড়ে গেছে অণু বাগানে ।
কর্মচঞ্চল পৃথিবী ।

বাদামী পালক ছড়ানো সবুজ ঘাসে
ছ এক টুকরো সাদা হাড়
এক আধ ফোঁটা রক্ত
(আগামী শীতে মোসুমীরা আরও উজ্জ্বল হবে)
বেড়াল নেই ।...

মালীরা ঘাস কাটছে
মেয়েটা এল না
প্রজাপতিরা ফিরে এসেছে ।
পৃথিবী মৃত্যুচঞ্চল ।

একুশ



অহন্যহনি

“দিনের পর দিন যাচ্ছে যমালয়ে,
থাকছে পড়ে যারা থাকছে নির্ভয়ে।”

হে যুধিষ্ঠির, ঘাবড়েছো কেন এ অসম্ভব দেখে ?
আজও তো আমরা শিখি নি কিছুই বার বার ঠেকে ঠেকে ।
আজও তো আমরা ফেলি ভালবেসে,
ভেবে খুসী হই দুটো মন মেশে,
কাদাঘোলাজলে গড়ে তোলা চলে নিখুঁত স্বর্ণস্বর্ণ,
পোকাধরা চালে তাইতো সাজাই স্বপ্ন প্রেমের অর্ঘ্য ।
মরছে দেখছি হাজারে হাজারে
গ্রামে ও শহরে গঞ্জে বাজারে,
যারা বাকি থাকি তারা তবু ভাবি আমাদের হবে ভিন্ন ;
হে যুধিষ্ঠির, এ মোহের জাল কখনও হবে কি ছিন্ন ?

“দিনের পর দিন যাক না যমালয়ে,
থাকবে পড়ে যারা থাকবে নির্ভয়ে।”



শেলী (অনুবাদ)

একটা কথা মলিন হল অপব্যবহারে,
তাকে মলিন করতে আমার বাজে ।
এক আকৃতি লুটিয়ে থাকে অপমানের ভারে
তার অপমান কর। তোমার সাজে ?
এক আশাতে একেবারে আশার আভাস নাই,
বিজ্ঞানে করেও না তার নাম ।
তোমার কাছে যে করুণা পাই
সবার থেকে বেশী যে তার দাম ।

প্রেম যাকে কয় পারব না তা দিতে,
কিন্তু গ্রহণ করবে না কি তাকে
যে পূজা হয় মনের নিভৃতিতে
দেবতারাও করে না হেলা যাকে ?
তারার তরে যে পতঙ্গ-তৃষা,
যে কামনায় রাত্রি উষায় চায়,
তুংখসাগর পারের অনির্দিশা
যে প্রগতি সবার কাছে পায় ।



জ্ঞানপাপী

বার বার প্রশ্ন করি—
কেন ভাল লাগে ?
প্রতিবার নূতন উত্তর ।

মিথ্যারই অনেক রূপ ;
সত্য এক ।
ভাললাগা মিথ্যা না কি ?

ভাললাগা !
কর ?
কাকে ?

আমি আমি নই,
আমি নেই,
আমি মিথ্যা।

(তব্ সত্য আমি) ।

তুমি তুমি নও,
তুমি নেই,
তুমি মিথ্যা।

(সত্য তব্ তুমি) ।

সত্যমিথ্যা ভেদ মিথ্যা না কি ?

জানি না ।
কেই বা জানে ?
শুধু জানি—
সবই যদি মিথ্যা হয়,
সত্য এই ভাললাগাটুকু ।



মরীচিকা

মনকে ঝাঁকতে পারি না কথায় । ঝাঁকি হিজিবিজি ।

উচ্ছ্বাস কেন ? হিজিবিজির মিল হয় ?

মিল নয়—মিলের মরীচিকা ।

মিল হয় নি—মিল হয় না ।

আমার কথা তোমার কানে আমার কথা নয়

তোমার মনের রং-ই তাদের রং ।

আমার নীল ছোট অপরাধিতা

নির্জন ছপূরের বিষণ্ণ সঙ্গী ।

তোমার নীল—আগ্নির উদার আকাশ ।

মিল কই ?

মিল নেই ।

আমার ভাষা তোমার মনে আমার ভাষা নয়

তোমার মনের রং-ই তাদের রং ।

তোমার হাসি তোমার হয়েও তোমার নয়

আয়নাতেও পাও না তুমি তাকে ।

আমি পাই চোখ বুজলেই—অন্ধকারেও ।

কোথায় মিল ?

মিল নেই ।

তোমার জিনিস আমার কাছে তোমার জিনিস নয়

আমার মনের রং-ই তাদের রং ।

মিল হয় নি—মিল হয় না—মিল তো মনের ছল,

মরুভূমির রৌরবে মিল মরীচিকার জল ।



ঘুঘু

ভোরের আলো ফোটে নি ভাল করে,
বাগানে এসেছি চাঁপাফুল তুলতে—

আজ তুমি আসবে ।

কোথায় ফুল ?
পাতায় পাতায় লুকিয়ে আছে সব ।
মিষ্টি গন্ধটুকু ভাসে বাতাসে—

নতুন প্রেমের মত,

বোঝা যায়, ছোঁয়া যায় না ।

হঠাৎ ঘুঘু ডেকে উঠল—

উদাস, ককণ, বিষণ্ণ—

আজকের নয়,

সেইদিনের ঘুঘু

যেদিন

এমনি ভোর হবে এখানে,

এমনিই ফুটবে চাঁপাফুল,

আর আমি

জানলার ধারে দাঁড়িয়ে

ভোরের আকাশে ছবি দেখব

শহরতলীর এক রান্নাঘরের—


যেখানে

কাঁচাকয়লার উলুনে বাতাস দিতে দিতে

নাকের জলে চোখের জলে হচ্ছ তুমি

(আচ্ছা, জলটা কি সবই ধোঁয়ার ?)

একত্রিশ



স্বপ্নসম্ভবা

নশ্চাং করে দিয়েছে। আমার দাবী,
স্বপ্নকে আমি মিছেই সত্য ভাবি ।
এটা কি করেছে ঠিক ?

স্বপ্নে স্বপ্নে সত্যের আলো

করে না কি ঝিকমিক ?

আর—

সত্য যে যায় সব স্বপ্নকে ছাড়িয়ে ।

ভাঙা মন্দিরে দাঁড়িয়ে

স্বপ্নে সত্যে সময় আঁচল বোনে

একান্তে নির্জনে ।

সে আঁচল যদি নাও পায় কোনো মাথা

পুতুল খেলার খেলাঘরে হবে পাতা ।

পুতুল খেলাই ভাল—

সত্যে স্বপ্নে একাকার হয়ে

কল্পনা জমকালে ।...

স্বপ্নিল বিশ্বাস

শূন্যতায় পূর্ণতার লেখে ইতিহাস ।

তাই তুলি দাবী

স্বপ্নকে সত্যের চেয়ে আরও সত্য ভাবি ।




যেনাহ্ম—

বহুযুগ আগে তুমি একবার বলেছিলে সেই কথা—
কি করব আমি এমন জিনিসে যাতে নেই অমৃততা ?
সে দিন থেকেই অমৃত খুঁজেছি জ্ঞানবিজ্ঞান দিয়ে,
বস্তুকে ছেড়ে মত্ত থোকছি শুধু বিচারকে নিয়ে,
বিশ্লেষণের ব্যাখ্যা শুনেছি, তত্ত্বের কিচিকিচি,
তর্কের মরুপ্রান্তরে ঘুরে বেড়িয়েছি মিছিমিছি ।
কিছুই পাইনি, কোথাও মেলে নি যাকে বল অমৃততা,
দিন দিন শুধু বেড়েই গিয়েছে জীবনের ব্যর্থতা ।

(হায় রে পৃথিবী, হায় রে মানুষ, হায় মৈত্রেয়ী, হায় রে !

যে জিনিস নেই, খুঁজলেই খালি কখনও তা পাওয়া যায় রে ?)

তার চেয়ে ভাল, এসো মৈত্রেয়ী, চলো না বাগানে যাই ;
সেখানে কেবল ফুল আর ফুল, কোনো সমস্যা নাই ।
ঝরে যায় ওরা ?—গেলই বা ঝরে, তবুও তো ওরা ফুল,
মিষ্টি গন্ধ, দেখতেও ভাল, সাজাতেও পারে চুল ।
আর ভেবে দেখো—সুন্দর ওরা অমৃততা নেই বলে ;
চিরদিন ফুটে থাকলে ওদের কদর যেত না চলে ?



তবু

আমার কথা— তোমার কবিতা ।

কে সত্য ?

কথা ?

কবিতা ?

শৌখিন মালকে ফোটা

হুদিনের মোসুমী কসমিয়া ।...

এ মালক ডুবে যাবে সময়ের অফুরন্ত বানে

কাদা পলিমাটি গলিত জন্তুর মাংস

হাড় পচাপাতা ভাঙা ডাল

নিষ্করণ পাথরের চাঁই

তছনছ করে দেবে মালকের সাজানো বাহার ।

আমি নেই সেইদিন

তুমি নেই .

মোসুমী কসমিয়াগুলো

সময়ের নীল জলশ্রোতে

ভেসে, নয় ডুবে গেছে ।

উদাস আকাশে শুধু

গাংচিলের তীরতীক্ষ্ণ ডাক ।

ঐ ডাকই কথা ও কবিতা ।

সব জানি ।

তবু খুসী হই

তবু তর্ক করি—

কে সত্য ?

কবিতা ?

কথা ?

তোমার কবিতা আমার কথা ।



দ্বন্দ্ব

আকাশ কাঁটার যন্ত্রণায় মরি,
ফুলের কাঁটা ফুটবেই ।
শুকনো ফুলের কাঁটায় বিষম বিষ ।

সাগরের নাম সাহারা
(সে-আমি এ-আমি নয়)
প্রতিমা কাদার তাল
(এ-তুমি সে-তুমি নও) ।
দর্শনের কথা নয়—জীবনের কথা
জীবনদর্শন নিজেই নিজেকে লেখে ।...

সব পড়া সাক্ষ করে নিরেট নির্বোধ ।
চুল ছিঁড়ে
মাথা ঢাকি গাধার টুপিতে ।
পণ্ডিতের ভাণ পরিত্রাণ,
মূর্ত মোক্ষ মৌনীবাবা ।
বিষনীল রক্তশ্রোতে তবুও উত্তাল
সোনার বাসনাস্বপ্ন
পূতিগন্ধ বীভৎস বাস্তব ।



শেষ নেই

আচমকা প্রশ্ন করেছিলে—

‘আমি তোমার ক’ নম্বর ?’

বেয়াড়া, বেখাপ্পা, বিদ্যুটে প্রশ্ন—

জবাব খুঁজে পাই না।

মিথ্যা বলায় রুচি নেই—সত্য বলার সাহস কোথা ?

চুপ করে থাকি

বোবার মত

বোকোর মত।

‘কি, কথা বলছো না যে বড় !

কথা বল, জবাব দাও।’

বুদ্ধিকে গুছিয়ে নিই,

হাসি একটু,

বলি—

‘তুমি অদ্বিতীয়া।’

খিল খিল করে হেসে ওঠো—

বিদ্যুতের ঝিলিকের মত, নকসাল তরুণীর হাতের ছুরির মত হাসি-

বলো—

‘তা তো জানিই, সকলেই অদ্বিতীয়া, অদ্বিতীয়া প্রত্যেকেই ;

ক’ নম্বরের অদ্বিতীয়া সেইটাই জানতে চাই।’

অনেক দিন চলে গেছে।

অনেক বছর।

প্রশ্নের উত্তর সেদিন তুমি পাও নি।

সঠিক উত্তর

আজও আমি খুঁজে চলেছি। .



কতোবার !

মন এলোমেলো বাতাস—
ঝরা শিউলির গন্ধ
কবিতার ভাঙা ছন্দ
ঈষৎহতাশ ভাববিলাসের
হঠাৎ-হঠাৎ দীর্ঘশ্বাস ।

মন বাতাস এলোমেলো—
শিরীষে শিরীষে তিরতির
শিরায় শিরায় শিরশির
গর্জন করে মার্জনাহীন
দুর্জয় ঝড় এলো ।

এলোমেলো বাতাস মন—
সঞ্চিত সব পুণ্য
পলকেই হয় শূন্য
দিনক্ষণ দেখে ঋণ গ্রহণের
আবার নতুন আবেদন



পৃথিবী— ? আমার পৃথিবী

অনেক খেলেছে তারা হাওয়াঝরা আকাশের নিচে
ঘুমঝরা ছপূরের কিনারে কিনারে অনেক হেসেছে তারা
লালনীল পুঁতি নিয়ে জানলায় বসে গেঁথেছে অনেক মালা
শিশিরেব প্রতিম্বত বর্ণালীর রঙে ভোরবেলা অনেক ভেসেছে ।
পৃথিবী— ? আমার পৃথিবী ।

নিরাভরণা সত্ববিধবা মাথায় তুলেছে ময়লা থান কাপড়ের আঁচল
রক্তহীন পাতলা ঠোট দুটি । রুখু চুল ওড়ে মিষ্টি হাওয়ায় ।
উদাসিনী । শুকনো চোখে চেয়ে আছে আগুনঝরা দিগন্তে ।
সবুজ সিঁদুর কে আবার পরাবে সিঁথিতে ? কোন্ শুভলগ্নে ?
পৃথিবী— ? আমার পৃথিবী ।

নিবস্ত ভীমপলশ্রী
মন্দাক্রান্তার আলতো ছোঁয়া
বিদ্যুতী মৃত্যু ।
ঝরণা ধারায় ভেসে যায় মরা দেহটা
সবুজ সাগরে শুক্তিমুক্তা
কোনো এক রাজকন্য়ার সিঁথিমউড় ।
পৃথিবী— ? আমার পৃথিবী ।



কংকাল

কবিতা মুছে ফেলেছি—
জীবন থেকে
আলমারি থেকে ।
কংকাল নিয়ে ঘর করে কেউ ?
বেশ আছি ।

ঘুম ভাঙে মাঝরাতে
খিলখিল করে হেসে ওঠে অন্ধকার
হো হো করে কংকালের দল ।
কোথায় তারা ? কোথায় ?
বালিশের তলায় ?
ব্লাউজের ভেতর ?
রক্তকণিকার অন্তরে অন্তরে ?...

আকাশ ভেঙে বৃষ্টি নামে
কংকালের দল হো হো করে ।
ঘামে ভিজে যাই
ঘুমিয়ে পড়ি ।...

ঝলমলিয়ে ওঠে নীল সকাল ।
কোথায় কংকাল ?

বাগানে ফুল ফুটেছে—
চোখ দিয়ে মন দিয়ে আদর করি ওদের
ভুলে যাই
সব ভুলে যাই ।

কিন্তু...কিন্তু.

আবারও তো রাত হবে ।



ফুলদানিটা

হাত থেকে পড়ে গেল ফুলদানিটা ।

চুরমার হয়ে গেল ।

চীনে মাটির সোনালী টুকরোগুলো

ছত্রখান হয়ে ছড়িয়ে পড়ল ঘরে ।

গোলাপ রজনীগন্ধা ডালিয়া চন্দ্রমল্লিকায় ভরে গেল ঘর—

যুগযুগান্তের ফুল,

কয়েকটা আমার

বাকী সবই তার ।

ফুলদানিটা ছিল আমার বিয়ের ।

(সোনালী চীনেমাটির টুকরোগুলো ঝিকঝিক করছে)

‘খোকন, ঝাঁটা নিয়ে আয়’ ।

খোকন ?—একটা বাচ্ছা,

খুট খাট কাজ করে

হীটারে কুকুর বসায়

রাত্রিরে শোয় আমার ঘরে ।

(বুড়ো মানুষের নাকি রাত্রিরে একা থাকে ঠিক নয় ।)

ফুলদানিটা আজ ভেঙে গেল—

ওটা ছিল আমার বিয়ের ফুলদানি ।

চীনেমাটির সোনালী টুকরোগুলো এইবার ঝিকঝিক করবে

বড় রাস্তার ধারে ডাষ্টবিনে—

তরকারীর শুকনো খোসা, পচা ভাত, মরা ছুঁচো, মুড়ো ঝাঁটা

আর ম্যানহোল থেকে তোলা পাঁকের ফাঁকে ফাঁকে ।



প্রাণ চায়—

আমাকে বিয়ে করবে তুমি ?—

এ প্রশ্নের উত্তর মেয়েরা দিতে পারে নী

দেয় না।

চুপ করে থাকতে দাও নি ;

বলতে হয়েছিল—

ভেবে দেখি নি ।

(মিথ্যে কথা—মিথ্যে কথা ;

এ ছাড়া যে আর কিছুই ভাবি নি কোনোদিন ।

কিন্তু তা কি বলা যায় ?)

বলেছিলে ভেবে দেখতে ।

আবার ডেকেছিলে আজ । বাইশ বছর পরে ।

গেছলাম ।

ভেবেছিলাম, যাব না ।

ডাক শুনে থাকতে পারি নি ।

(অমন করে ডাকতে আছে ?)

বললে—

এসো না, এবারে আমরা বিয়ে করি ।

কঠোর হতে, কঠিন হতে আজ আমার বাধে না,

মুখে আটকায় না কিছু

(অনেক পোড় খেয়েছি) ।

বললাম—

খেলা তো প্রায় শেষ ।

এ বাজী জলেই গেল ।

কত চাল আর ফেরৎ নেব ?

নতুন করে ছক সাজাবারই বা সময় কই ?

অন্ধকার নামল বলে ।

আবার বলেছো ভেবে দেখতে ।...


তুমি একেবারে পাল্টাও নি । সেই আছে । আমিও ।

জোর করো না কেন ?

রাগ হলেও রাগ করব না আমি ।

আমি যে পারি না—

আমার ভয় হয় ।



পুতুল

তুমি আমার পুতুল
রং দিতে চাই মনের মত
সাজাতে যাই পছন্দসই
ইচ্ছে হয় আদর করতে ।
পারি না কিছুই ।
তুমি তো পুতুল নও ।

পুড়ে মরি রাগে
তোমাকেও লাগে তার হলকা ।
আকস্মিক মরি
বার বার
বার বার ।

কবে যে মানুষ ভাবতে শিখবে তোমাকে
শিখবে ভালবাসতে !

তিপ্পান



সান্ত্বনা

[১]

বর্ণালীর রং, রেশমের কোমলতা,

আর চামেলীর সৌরভ—

সব মিলে কবিতা

—আমার সান্ত্বনা—

অসম্ভবের আকাশ থেকে ঠিকরেপড়া

একটুকরো স্বপ্ন,

ফিকেনীল পাহাড়ী হাওয়ায় ভেসে-আসা

সাঁওতালী বাঁশীর সুর,

কথা দিয়ে নাগাল পাই না ।...

রূপ রস শব্দ গন্ধ স্পর্শ—

কাউকেই তো পারি না ছুঁতে ভাষায় ।

তবু কবিতা—

আমার সান্ত্বনা ।

[২]

ক্যামেরা বিশ্বাসঘাতক—

অস্পষ্ট হয়েছে তোমার ছবি ।

ঠিকই হয়েছে—

তুমিও অস্পষ্ট আমার কাছে ।

ক্যালিডোস্কোপই ভাল—

নানা রঙের টুকরো তুমির


ছবি দেখি ঘুরিয়ে ঘুরিয়ে,

(ইচ্ছে মতন) ।

ভাঙবে যখন ক্যালিডোস্কোপ—

রং-বেরংয়ের টুকরোগুলো,

ছড়িয়ে ছিটিয়ে পড়বে আমার খাতায় ।



মানুষ-আয়না-কবিতা

কবিতা কি দেখা যায় ?

আয়নায় মুখই তো দেখো না,

কবিতা দেখবে কোথা ?

মানুষ কবিতা হয় নাকি ?

মানুষই কবিতা হয় শুধু,

আর—মানুষেরই আলো লেগে সব কিছু কাব্য হয়ে ওঠে।

মানুষের আলো থাকে ?


আলো মানুষেরই থাকে,

যদিও সে নিজেই জানে না।

আর—জানে না বলেই

মানুষ কবিতা হয়ে ওঠে,

মানুষ কবিতা হয়ে ফোটে।



শেষ প্রেম

আমার জীবন এক দীর্ঘায়িত স্বপ্নের মত
পরিপূর্ণ ঐশ্বর্যসম্ভারে—অগোছাল, হেলাফেলা

(স্বপ্নে কি, শৃঙ্খলা আশা কর ?), তবু তার
নিবিড় অস্তরে সিন্ধুনির মূল সুর বাজে ।
কি করেছি, কেন বা করেছি, করাটা উচিত ছিল কিনা—
সব প্রশ্ন অবাস্তুর (স্বপ্নই যে অবাস্তুর নিজে) ।
যা করা উচিত ছিল কেন তা করিনি,
না করার কি ফল হয়েছে—নিষ্ফল বিচার তারও
(স্বপ্নে বিচারের স্থান নেই) ।
আমার জীবন তাই দীর্ঘায়িত স্নস্বপ্নের মত
ঝিকিঝিকি করে আজ গোধূলির রক্ত রশ্মিজালে ।


আমার জীবন এক দীর্ঘায়িত স্নস্বপ্নের মত ;
কোনো প্রশ্ন নেই তাতে, নেই কোনো অতৃপ্ত বাসনা,
হিসাব নিকাশ নেই, ভালমন্দ কোনো বোধ নেই,
বাধা নেই, বন্ধ নেই, ছেদ নেই (স্বপ্নে তো থাকে না ছেদ),
আছে শুধু আনন্দের অজস্র বর্ষণ—যে আনন্দে
কাব্য জাগে, সুর জাগে, ছবি জাগে, জাগে স্নন্দরের জয়গান ।
আমার জীবন তাই দীর্ঘায়িত স্নস্বপ্নের মত
ঝিকিঝিকি করে ওঠে সূর্যাস্তের উষা-রক্তিমায় ।

আমার জীবন এক দীর্ঘায়িত স্নস্বপ্নের মত—
কখনও বা মৃদু মমতায় সিক্ত, কখনও বা
নিষ্পৃহ, নির্মম ; ক্ষমান্বিত উদাসীন বৈরাগীর মত
কোনোদিন, কোনোদিন ক্ষুরধার ক্ষুর তরবারি ।
অনেক আমি-র মালা গেঁথে গেছি এই ভাবে,
কোন্ আমি ঠিক আমি, ভেবেও দেখিনি একবার
(স্বপ্নে কি ভাবার স্থান আছে ?), আর তাই
আমার জীবন এক দীর্ঘায়িত স্নস্বপ্নের মত
ঝিকিঝিকি করে আজও শুকতার। আলোকসম্পাতে,
বিধাতার মৌন আশীর্বাদে
আর স্নিগ্ধ শুভ হাসিতে তোমার ।



উপলক্ষ্য

যারা দেখে তারা ভাবে তুমিই তো লক্ষ্য,
হায়রে, জানেনা কেউ শুধু উপলক্ষ্য ।
হীরের ফুলকে যদি চাও হাতে দলতে,
রক্তই ঝরে খালি, কান হয় মলতে ।
কবি বোলে জীবটাকে বিশ্বাস কোরো না,
কঠিন মাটিটি ছেড়ে একদম উড়ো না ।
যত খুসী মিঠে বুলি ও বলুক কাব্যে,
রঙীন কুয়াসা সদি, সর্বদা ভাববে ।
তাই বলে বলছিলা সব কিছু মিথ্যে,
একটুও দোলা তার লাগে নাকো চিত্তে ।
কিন্তু সে কতক্ষণ ? কটা বা মুহূর্ত ?
ঝিলমিলে মন তার চঞ্চল ধৃত ।
এই আছে, এই নেই—ধরা অতি শক্ত ,
ঝঞ্জাটই বাড়ে খালি হলে কবিভক্ত ।
সকলে ধরেই নেয় তুমি ওর লক্ষ্য ;
কিন্তু (হায় রে তুমি !) শুধু উপলক্ষ্য ।



দণ্ডকারণ্যে

বন্ধুতা এতো সোজা নয় সখি,
পাথরের মত মন চাই ।
ফুলকে পাথর করার মন্ত্র জান কি ?
চাপে আর তাপে ফুল যে কয়লা হয়,
তাপে আর চাপে কয়লা হয় যে হীরে ।
হীরের ফুলের নাকছাবি চাও বুঝি !

শূর্ণখার গল্প দেখো গে পড়ে,
নাকটা বাঁচলে নাকছাবি তার পরে ।

পথে প্রান্তরে শূর্ণখার ছায়া,
লজ্জায় ভয়ে পৃথিবী বুজেছে চোখ,
রক্ত আগুন বাঘের মতন জলে,
ব্যথাতুর কাঁদে ব্যর্থ স্বর্গলোক ।
এইদুর্যোগে কৰ্জ কে দেবে বন্দো ?
হিসাবনিকাশে দুরন্ত গরমিল ।



সংখ্যার সাংখ্য

আমি ক' নম্বর ?

কৈপে ওঠে ঘরের হাওয়া ।

কথা বোলছে না ?

জবাব দাও ।

বল ।

তুমি অদ্বিতীয়া ।

এক ঝিলিক হাসি—বিদ্যুতের, বর্ষাফলার ।

অদ্বিতীয়া ! ক' নম্বরের অদ্বিতীয়া ?

কেটে গেছে


অনেক দিন

মাস

বছর ।

নম্বর খুঁজছি ।

বিজ্ঞান বলে— সংখ্যা অশেষ ।



কলহ

কালবোশেখী হঠাৎ আসে ।
ধুলো ওড়ে
ঝরাপাতা ঘুরপাক খায়
মড়মড়িয়ে ভাঙে গাছের ডাল
খোড়া বাড়ীর চাল ওড়ে উধাও শূন্যে
আকাশ কালোয় কালো
বৃষ্টির তার বেঁধে
বাজ ওঠে কড়কড়িয়ে—
একটুকরো প্রলয় ।

কোথায় প্রলয় ?

ঝিকঝিকে সবুজ ঘাস
টপটপ জল পড়ে ভিজে পাতার
ভ্যাপ্‌সার পর মিষ্টি ঠাণ্ডা
আকাশ ঝকঝকে নীল
অগ্নদিনের চেয়ে অনেক অনেক উঁচু
নাম-না-জানা পাখীরা ডানা এলিয়ে ভাসে
হৈ হৈ করছে খোকাখুবুরা—
রামধনু উঠেছে ।

তাই আমি ভালবাসি ।

কালবোশেখী কঠোর আঘাতে
উদ্ঘাটিত করে
উদ্ভাসিত করে
উৎসারিত করে
পৃথিবীকে
তোমাকে ।



মিটমাট

আমি যদি বাগড়া কবি তুমি তবে মিটিয়ে নিও ।

যদি আমি ভেঙেচুরে

বলি সব থাক না পুড়ে,

আগুন লাগাই ঘরে তুমি জল ছিটিয়ে দিও ।

তুমি সব মিটিয়ে নিও ।

যদি আমি বায়না ধরি,

অথবা জুলুম করি,

তুমি তবে মিষ্টি হেসে আচ্ছা কোরে পিটিয়ে দিও ।

তুমি সব মিটিয়ে নিও ।

উনসত্তর



ছোট ছোট

ছোট ছোট ঢেউ ভাঙে আলোর নদীতে
হীরেকুচি ঝিক ঝিক করে ।
অঞ্জলি অঞ্জলি তুলি ঢেউ,
এক কুচি হীরেও পাইনা ।

ছোট ছোট হাসি ঝরে মালতীর বনে
শিশিরের স্নিগ্ধ টুপটাপ ।
মালতী গদায় ভারি ঘর
শিশির কোথায় পাই বলো ।

ছোট ছোট অন্ধকার খুট খুট কোরে
ফোঁটায় চুমকীর ফুল ।
চোখ বুজে অন্ধকার ধরি,
চুমকীরা হারিয়ে যায় কেন ?

ছোট ছোট হাওয়া লাগে পাইনের ডালে
কপালে কপোলে ওড়ে চুল ।
হাওয়া ছুঁই অনায়াসে সারা অঙ্গ দিয়ে,
চুল ছুঁই কোন্‌ দুঃসাহসে ?




চিঠির কচি

ভেসে যায় স্মৃতিগুলো
হান্কা হাওয়ায় যেমন ভেসে যায়
কেটে যাওয়া ঘুড়ি ।
মমতা আছে—মায়া নেই ।
যার হাতে পড়বে,
ওরা তারই হোক ।

ছড়িয়ে দিই স্মৃতিগুলো
যেমন ছড়িয়ে দেয় নাকচ প্রেমিক
নীল চিঠির কচিগুলো
তিনতলার জানলা থেকে ।

ভেলভেটের মত সবুজ ঘাসে
ঝরাশিউল্লির ফাঁকে ফাঁকে
ঘুরে ঘুরে
উড়ে উড়ে
ছড়িয়ে যায়
ঘুমিয়ে পড়ে ওরা ।
অমনি আলতোভাবে ছড়িয়ে পড়ে আমার স্মৃতিগুলো
হেলাফেলা
এলোমেলো
কবিতার লাইনে লাইনে—
অমনিভাবেই ঘুমিয়ে থাকে ।



পক্ষপাত

আলোয় আচ্ছন্ন কর কিছুক্ষণ
সরে যাও
অন্ধকার নেমে আসে ।
তার কোনো দায় নেই ?
অমন নির্ভুর হও কেন ?...

অন্ধকার আদিকরূপ
আলো অনিয়ম
চলমান ছায়াছবি থেমে গেলে বীভৎস তাণ্ডব ।
পেগুলাম দোলে
চেতনার কাঁটা কাঁপে সময়ের ক্ষুধিত মিটারে ।

...শুধুই খেলুড়ে নই,
খেলনাও ।

আলোয় আচ্ছন্ন হই কিছুক্ষণ
সরে যায়
অন্ধকার নামে
দোলে পেগুলাম
সময়ের কাঁটা কাঁপে চেতনার বিক্ষুব্ধ মিটারে ।...
তার জগে দুঃখ কই ?
এমন নির্ভুর কেন তুমি ?



জীবন-জীবন

গলিতে এক চলিতে রোদ ।

মরা বেড়ালছানার নাড়ীভুঁড়ি নিয়ে ছুটো কাকের ছেঁড়াছেঁড়ি ,

সামনের বারান্দায় পায়রাগুলোর নিলজ্জ প্রেম ;

চন্দনার উচ্ছিষ্টে চড়াই সিদ্ধকাম ,

আকাশের নীল ফালিতে ঘুরে ঘুরে ওড়। ছুটো চল—

গলিতে এক চলিতে রোদ ।

টু টাং ঘণ্টা বাজিয়ে একটা রিক্সা যায় ,

বুড়ো মুচি মরা বেড়ালছানার পাশে বসে যন্ত্রপাতি সাজিয়ে ,

উত্তর প্রান্তের জোয়ান মদটার হাঁকে পুরোণো বাড়ীর চুণ বালি খসে ;

জগন্মাতা অন্নপূর্ণার স্বরে মধু ঝরে—‘ক্ষুদ নেবে গো’ ;

সেজে গুজে ছুটো মেয়ে কলেজে যায়,

পিছনে ছুটো হাংলামুখো ছেলে—

গলিতে এক চলিতে রোদ ।

আকাশের নীল ফালিতে চল ছুটো তখনও ঘুরপাক খায় ।



জানোয়ার

হালুম কোরে বেরিয়ে আসে জানোয়ারটা
জলজলে চোখ, ঝকঝকে দাঁত,
খাড়া রোমে শক্তিমদের ফিন্‌কি ।

অজস্র ভীড়ের চাপ । হে ঈশ্বর, ভীড় কমাও ।
মানুষ, মানুষ, মানুষ, মানুষ, মানুষ ।


খোঁচাখাওয়া, রোঁয়াওঠা, দাঁতভাঙা জানোয়ারটা গুহায় ঢোকে,
নিশ্চিন্ত নিশ্চিন্দ্র অন্ধকারে এলিয়ে দেয় দেহ ।
কাতরায় গুমরে ওঠে গরগর করে অন্ধকার,
নরম জিভ বোলায় দগদগে ঘায়ে ।

চিকণ হয় শরীর । ফেরে দাঁতের শান ।
গুহার নিরুপদ্রব নির্জনতা তোলপাড় হয়

জানোয়ারটার হালুমহলুমে ।...

বাইরে অজস্র ভীড় ।
মানুষ, মানুষ, মানুষ, মানুষ
হে ঈশ্বর, ভীড় কমাও ।

ଶ୍ରୀକୃଷ୍ଣ
କୃଷ୍ଣକାନ୍ତ
କୃଷ୍ଣାକାନ୍ତ
କୃଷ୍ଣାକାନ୍ତ



ঋবতারার ছাই

অন্ধকার ঘরে বসে মুঠো মুঠো অন্ধকার ধরি ।

খুসী হই, উত্তেজিত হই, মুঠো খুলে দেখি ।

অন্ধকার অন্ধকারে মিশে যায়—

কিছুই পড়ে নি ধরা ।

ফের মুঠো করি হাত ।...

নিজেকে জানব ।

সক্রেটিসের রক্ত আজও গরম । গরমই ।

বাসনার তারা ঢাকি নিস্পৃহার ধূসর কন্ডলে ।

কন্ডলে অনেক ফুটো । ফুটো সারি ।

সেলাইয়ের ফাঁকে ফাঁকে তারাগুলি ঝিক ঝিক করে । ..

নির্বাণ চাই ।

বুদ্ধের আত্মা এখনও লাট খায় । লাটই খায় ।

লতাপাতা আঁকা ফেঁছনে লিখি—ভালবাসো, ক্ষমা করো ।

নাম ওঠে আশাবাদী শিল্পীর তালিকায় ।

ওঠে বাহবার ঝড় ।

ঝড়ের ফাঁকে ওরা পকেট কাটে—গলাও ।

রোদে ফ্যাকাসে লেখা জলে ধুয়ে যায় ।

আবার লিখি ।...

যিশুর ক্রুশ তেমনি দিগন্ত কলঙ্কিত করে । তেমনিই ।

আস্তিক চেঁচিয়ে ওঠে—নিরাশ হোয়ো না ; হবে, হবে, হতেই হবে ।

অবিশ্বাসী মাথা নাড়ে—হয় নি, হয় না, হতে পারে না ।...

ইতিহাস নির্বিকার—

ঋবতারার ছাই উড়ছে ।



অন্ধকারের সুর

সমবেদনা-আকাজ্জার আভাস ছিল না

ক্ষোভ ছিল না স্বরে ।

নিশ্চেষ্ট নিরুত্তাপ কণ্ঠে বলেছিলে—

আমি একাকিনী ।

(সহজভাবে শব্দকথা বলা আঁট—

তু আঁচড়ে গোটা মানুষকে ফোটানো ।

তুমি আঁটিষ্ট । তুমি পার ।)

মাঝে মাঝে এমনি হয় ।

মনে হয় হেরে গেছি

স্বার্থের দাবাখেলায় একেবারে মাং ।

সংসার বিশ্বাদ লাগে

বেদনাবোধ মরে যায়

আত্মহত্যারও ইচ্ছা থাকে না ।

বাতি-নেবা জমাট অন্ধকার ।

(অন্ধকারের সুর—আমি একাকিনী ।)

বোঝাতে চেয়েছিলাম তুমি একাকিনী নও ।

পারি নি ।

এ বোঝাবার ভাষা

মানুষ এখনও খুঁজে পায় নি ।...


উধাও হাওয়ায় ভেসে যায় সঙ্গীহীন মেঘের দল

ঘূর্ণি ঝড়ে পাগল ঝরাপাতারা ঘুরপাক খায়,

আর ঘুরপাক খায়—

নিষ্পৃহ নির্লিপ্ত নিরাসক্ত কণ্ঠের ছাঁট কথা—

আমি একাকিনী ।



কবির প্রেম

[১]

কবিতার খাতা হারিয়ে ফেলেছি অনুযোগ কর তাই ;
খাতা খোয়া যাক ; মন তো রয়েছে, দুঃখের কিছু নাই ।
শুধু মন নয়, তুমিও রয়েছে—কিছুই চাই না আর ;
নতুন খাতায় নতুন কবিতা শুরু হবে এইবার ।
তবে ভয় হয় জীর্ণ এ মনে আর কি ফুটবে ফুল,
ভাব ভাষা আর চিত্রকল্পে হবে না তো ভণ্ড ?
সেটা যে তোমার হবে অপমান, সহিতে পারব না তা,
তার চেয়ে ভাল সাদা ফেলে রাখা কবিতার এই খাতা ।
সেটাও পারি না, কাগজে কেবলই হিজিবিজি কেটে চলি,
মাঝে মাঝে ভাবি কবিতার কথা মুখেই তোমায় বলি ।
সেই কথা শুনে হয়তো হাসবে একটু তেরচা হাসি
মনে হয়, তাই কিছুটা এগিয়ে তক্ষুণি ফিরে আসি ।
এই দোটার্নায় মুক্তি কোথায় ভেবেই পাই না তা যে,
হৃদয়ম তাই নিজেকে ডোবাই লক্ষ রকম কাজে ।

কাজ কিছু নয়, ওই গুলো খালি নিজেকে ভোলার ফন্দি,
নিজের এ জালে নিজেকেই আমি করে ফেলেছি যে বন্দী ।
কবিতাই একা মুক্তিদাত্রী । আত্মক কবিতা তবে ;
ভাবব না আর, এর পরিণাম কোথায় কি ভাবে হবে ।
কবিতার পর কবিতা লিখব শুধু তোমাকেই ঘিরে
শেষ হলে লেখা বাতাসকে দেব কুচি কুচি কোরে ছিঁড়ে ।
তুমি জানবে না, আমিও ভাবব—এইবারে যাক ভোলা ;
কিন্তু বলো তো, অপড়া কবিতা দেবে না তোমাকে দোলা ?

[২]

খাতা নেই । তুমি আছ । কবিতা ?

কবিতা পড়তে শেখো নি চোখে ? বুঝতে পার না ?
ঐ তো কাঁপছে ইথারে । আমার চৈতন্যে ।
গুহামানবের অন্ধে অন্ধে ।
অতিমানবের ষষ্ঠ ইন্দ্রিয়ে ।
মিল নেই । ছন্দ নেই । অর্থ নেই । ভাষা নেই ।

তুমি আছ । সব আছে ।

অসহ যন্ত্রণা অমেয় আনন্দ

কবিতা পড়তে পার না রক্তে ? জানতে পার না ?
ঐ তো কাঁদছে প্লাজমায় । তোমার সত্তায় ।
আনুবীক্ষণিক জীবাণুতে ।
বিশ্বব্রহ্মাণ্ডের হৃদস্পন্দনে ।
রূপ নেই । রস নেই । শব্দ নেই । গন্ধ নেই । স্পর্শ নেই ।

আমি আছি । সব আছে ।

অতল অঙ্ককার । অজস্র আলো ।

নাই বা রইলো খাতা । আমরা আছি । কবিতা আছে ।

পড়বে ?

পঁচাশি




জলের ফোঁটা

চিঠি এল অনেক বছর পরে ।
লিখেছ কবিতা লিখতে ভুলে গেছি ।
ভুল বল নি ।
কেন ভুলেছি জান না ?

রামধনু পাও যখন,
 ধনুবাদ দাও কি সূর্যকে ?
না, সেই ছোট জলকণাটাকে
 যে হঠাৎ এসে
 রঙে রঙে রাঙিয়ে তোলে আকাশকে ?
জলকণাকে না পেলে
 সূর্য কি রামধনু সৃষ্টি করতে পারে ?

এখনও বোঝ নি
 কবিতা লিখি না কেন ?
 কেন ভুলেছি ?



নীল তীর

[১]

সন্ধ্যার গন্ধ বাতানে আকাশে অন্ধকারের পায়ের আওয়াজ
নীলকণ্ঠের ঝাঁক ক্লান্ত ডানায় অনেকক্ষণ উড়ে গেছে ।
মরা বকুলগাছটা আবছায়ায় দাঁড়িয়ে ভূতের মত—
সব দেখে শোনে সব কেঁপে ওঠে এক এক বার
কিন্তু ফুল ফোটাতে কোন রসে ?

(যা যায় তা কি আর ফেরে ?)

তুমি আমাকে মুক্তি দাও
কবিতা লিখতে বোলো না ।
আর পারি না ।

[২]

মল্লিকা ঝরে গেছে অকালে—থরায়—অযত্নে ।
শেষ শরতে কুঞ্জ ভরে দিয়েছে মালতী—
পবিত্রতায় স্নিগ্ধ, ভালবাসায় করুণ ।

মালতী মল্লিকা ?

নীল তীর এফোড় ওফোড় করে ইন্দ্রজাল ।

(যে যায় সে কি আর ফেরে ?)

তুমি আমাকে মুক্তি দাও
কবিতা লিখতে বোলো না
আমি পারব না ।

যা যায় তা কি আর ফেরে ?

যে যায়—